

閩中撫聞卷三

閩晉江陳雲程孫鵬輯

泉州府

唐觀察常袞有文章高名好誘後進一見歐陽詹比爲芝英

貞元八年陸贄知貢舉取歐陽詹第二人一時韓愈李觀李絳崔羣王涯馮宿庾承宣皆登第稱龍虎榜故劉昌言詩云一舉首登龍虎榜十年身到鳳凰池

歐陽詹初發太原途中寄所思詩高城已不見况復城中人此古樂府體也黃璞乃有太原函髻之謗謂公悅一妓以此隕身好

閩中撫聞

泉州府

事者傳之

歐陽詹與莆中林藻林蘊善同肄業於莆之廣化寺靈巖精舍後卒京師歸櫬至莆遂葬其讀書處林衡士過歐墓有句云滿院蓬蒿數十尺先生苔骨化成石四門聲教風雨高山鬼啾啾來跳躑乾隆庚午爲林族佔沒得莆令王公文昭清出乃復其舊紳士賦詩頌之

許稷挾策入關遇舍人陳詡四門助教歐陽詹校書郎邵楚萇侍御林藻在京師閩川舉子釀酒食會諸先達詹以稷鄉人親故特與俱詡酣戲稷曰今日之會子何人斯輒冒其閒稷投杯憤

誹曰男兒患不能立志霄漢豈有局鐻王侯出處豈必常耶叨此一殮稷之過矣噉酒而出入終南山讀書出就府薦遂擢第晉江黃宗旦字叔才有神童稱其大父命題早春詩有就中喜有龍門客躍出洪波只待雷之句咸平元年進士第二人與鄉人李慶孫齊名人爲語曰國朝才子黃宗旦天下文章李慶孫唐黃守恭自光州移居泉州樂善好施人稱長者垂拱間夢一僧乞所居地爲寺唯之曰樹產白蓮乃可越二日桑樹果開蓮花遂捨宅爲寺卽今之開元寺也

泉州開元寺初名蓮花寺亦名紫雲寺寺有二塔東塔號鎮國唐

閩中撫聞

泉州府

二

咸亨間僧文偃以木爲之宋易以石西塔梁貞明間王審知建亦以木爲之號無量仁壽塔宋紹興間始爲石塔

會稽秦公緒

系

避天寶之亂居南安九日山山有大松百餘章爲

東晉時物公緒結廬其下穴石爲硯注老子彌年不出姜公輔謫泉訪之與語窮日不能去乃築室依焉公輔卒公緒葬之山下人爲立亭曰秦君亭號山爲高士峰 國朝姜西溟有謁姜相墳詩云白楊已被行人折鷓鴣徒悲故相墳寒食空山頻灑淚千年忠魄冷荒雲

韓偓流寓閩中號玉山樵人後卒於南安龍興寺有南安寓居詩

此地三年偶寓家枳籬茆屋其桑麻蝶矜翅暖徐窺草蜂倚身
輕浪著花天近函關屯紫氣水通吳甸浸晴霞豈知卜肆嚴夫
子潛指星磯認海查

韓偓捐館日溫陵帥聞其家藏箱笥頗多而鍼鏹甚固發觀得燒
殘龍鳳燭金縷紅巾百餘條蠟淚尚新巾香猶鬱乃偓爲學士
時視草金鑾宮人秉燭送歸者

羅隱餘杭人自號江東生咸通中遊晉江乞食於羅裳山下山下
人侮之乃畫馬石上每夜出食人禾追之則見馬入石中山下
人禮焉隱爲畫椿馬不復出

閩中撫聞

泉州府

三

王審邦之子延彬襲其父封于泉有詩曰兩衙前後訟堂清軟錦
披袍擁鼻行雨後綠苔侵履跡春深紅杏鎖鶯聲因攜久醞松
醪酒自煮新抽竹筴羹也解爲詩也爲政儂家何似謝宣城人
多誦之

詹敦仁勸王氏入貢王氏寵予以官作辭命篇曰爭帝圖王事總
非中原失統可傷悲往來賓客如郵傳勝負干戈似局棋周粟
縱榮寧忍食葛廬頻顧謾勞思江山有待早歸去好向鷓林擇
一枝乃築清隱堂於清溪之佛耳山

閩王氏亡國留從効繼領留後務雖稱藩南唐實雄據一隅先是

妙應大師黃涅槃有識云先打南後打北留取清源作佛國後清源果有干戈之擾爲從効姓名之應

五代留從効于泉城重加版築旁植刺桐歲久繁密其木高大枝葉茂蔚初夏時開花鮮紅葉先萌芽而花後發則年穀豐登故丁晉公詩有我今到此憂民切只愛青青不愛紅之句又陳陶詩云鬢鬢三珠植世間風光滿地赤城閒無因秉燭看奇樹長伴劉公醉玉山海曲春深滿郡霞越人多種刺桐花可憐虎竹西樓色錦帳三千阿母家

宋劉昌言極有才思下第作詩落句云唯有夜來蝴蝶夢翩翩飛

閩中撫聞

泉州府

四

入刺桐花後爲商州記室王禹偁贈詩云年來復有事堪嗟載筆商州鬢欲華酒好未陪紅杏宴詩狂多憶刺桐花蓋爲是也嘉禾嶼在海中名鷺島廣袤五十餘里商賈雲集舛舛遠通上有鼓浪嶼雞鳴時登絕頂遙望海日如火輪 國朝倪隨庵詩云絕頂雞鳴觀日出懸崖霧散現蜂窠是也又有塲老山唐處士陳黯讀書處臨海有黯釣魚磯北則龍溪尉薛沙居焉沙爲令

自長溪徙此稱南陳北薛

吳真人名本同安人由貢舉授御史宋仁宗時醫帝后愈煉丹救世景祐間蛻化于漳州白礁乘鶴昇天後屢著靈異永樂中封

保生大帝

蘇緘知邕州交寇圍邕四十二日緘晝夜令士卒發神臂弓射賊所殪甚衆賊將引去或教以囊土傅城高數丈賊蜂擁而登城陷緘領傷卒厲戰至力不敵乃曰吾義不死賊手亟還泊殺其家二十六人藏於坎乃縱火自焚寇至求屍不獲神宗聞緘死爲之嗟悼至晡時方進膳歎曰可惜蘇緘近世忠義之士罕有其匹諡曰忠勇邕人祀之

魯公會公亮少客京師有客泣鄰舍甚悲問之曰負錢鬻女於商問其直曰四十萬公亮如數予之其人擇日送女則公亮已解

閩中撫聞

泉州府

五

纜三日矣天聖二年成進士

錢熙南安人嘗撰三酌酸文世稱精絕略曰渭水凝碧早拋釣月之流高嶺排青不逐眠雲之客又曰年年落第春風徒泣於遷鶯處處羈遊夜雨空悲於斷雁其卒也鄉人李慶孫哭之曰四彝妙賦無人誦三酌酸文舉世傳

李綸提舉廣東常平曰適兄縝出守恩平酌於江濱相勵以清白傳家綸慷慨言曰倘負斯言有如此水遂投杯於江時江水洶洶杯不沒者久之觀者無不驚歎民歌之曰石門之木清且清良吏一歎千古榮爭如李公投杯盟江流洶洶杯停停至今石

刻與吳隱之酌貪泉詩對峙

洛陽江界晉惠二邑唐宣宗微行至此嘆曰此開山水大似吾洛陽故名

蔡忠惠襄洛陽橋碑文云泉州萬安渡石橋始造於皇祐五年四月庚寅以嘉祐四年十二月辛未訖功累趾於淵醜水為四十七道梁空以行其長三千六百尺廣丈有五尺翌以扶欄如其長之數而兩之糜金錢一千四百萬求諸施者渡實支海去舟而徒易危而安民莫不利職其事盧錫王實許忠浮圖義波宗善等十有五人既成太守莆陽蔡襄為之合樂讌歌而落之明

閩中撫聞

泉州府

六

年秋蒙召還京道由是出因記所作勒於岸左

萬安橋記作碑二段今在忠惠祠中橋坦夷如官道可五里許兼以忠惠記文書筆並精千古於是好事者競傳橋異謂橋未興時深不可趾忠惠為檄使隸隸名夏投之海若而告之隸嘆息曰茫茫遠海何所投檄買酒劇醉臥小艇上起視則檄已換第書一醋字忠惠曰神示我矣當廿一日酉時潮退可趾也又二碑之石一粗一膩好事者復云外國人摹仿其書勒粗石上夜換載歸此二事要屬齊東而列朝卿傳又以移檄海神作蔡錫修橋事亦不知何據也

仁宗皇祐間蔡忠惠以便養知泉州架洛陽橋先時公爲閩使
者夾道種松以蔽煇毒閩人卽橋旁作堂以祀之又作詩二章
俾歌以祀公云道邊松大義渡至泉漳東問誰植之我蔡公
歲久廣蔭如雲濃甘棠蔽芾安可同委蛇天矯騰蒼龍行人六
月不知暑千古萬古長清風一云洛陽橋一望五里排瓊瑤行
人不知滄海潮衝之往來乘仙飈蔡公作成去還朝玉虹依舊
橫雲霄考之溱洧功何遙千古萬古無傾搖

蘇隨登嘉祐二年進士任博羅令棄官歸隱栖霞洞葆神鍊氣不
與俗接人稱紫雲先生一夕夢遊異境覺而賦詩曰夢乘鸞鳳

閩中撫聞 泉州府

到仙家侍女風流魏月華琥珀盞斟千歲酒琉璃屏種四時花
金函藏籙文刊玉石壁題名篆點砂一枕北窓初睡覺日移門
外柳陰斜後數年端坐而逝

韓國華守泉時生魏公琦於官舍治前榕樹悉開花如班枝郡人

石刻國華及魏公像祀於府中命府治之堂曰忠獻後易以清
署至王梅溪十朋守此乃仍其舊爲詩曰相出相州生此州

巖勲業宋伊周後人莫要輕更改更有堂名似此不又署有安
靜堂爲蔡忠惠所作嘗於此書荔支譜梅溪解官時有復安靜

堂舊額詩

泉州府治舊在雙門頂明太守常性移於東街後人以魏公証
卽其地建生韓古廟以祀城隍俗人附會謂衙中榕樹生班枝
花侍婢連理取以奉國華國華幸之懷孕爲嫡夫人所逐乃生
魏公於廟世傳班枝記雜劇是也移署之事稀有知之者
晉江魏國夫人宋龍圖學士陳從易之女內翰蘇紳之妻而丞相
頌母也從易紳頌皆嘗守杭夫人三至杭邸題邸柱云吾少從
父至此中與吾夫偕今同吾兒凡三閱江山之勝蘇文忠輓詞
云雞鳴爲善日日新八十三年如一晨豈惟室家宜壽母實爲
朝廷生異人

閩中撫聞

泉州府

八

崔唐臣與蘇子容頌吳晉叔濬同學相好二公先後登第唐臣遂

罷舉業久不相問嘉祐中二公在館下一日忽見艤舟汴岸者
唐臣也亟就見之邀與歸不可翌日唐臣留刺再謁之則舟不
知所往矣歸視其刺刺之末有細字一絕云集仙仙客問生涯
買得漁舟度歲華案有黃庭樽有酒少風波處便爲家

呂惠卿與蘇子瞻相仇隙惠卿至貶所謝表云龍鱗鳳翼固絕意
於攀援燕臂鼠肝一冥心於造化子瞻於邸報見之笑曰吉甫
終會作文字

紹聖中呂惠卿復知延州途出西都時程伊川居里謂門人曰吾

聞呂吉甫未識其面明且西去必經吾門且一覘之迨旦了無所聞詢之則過去已久矣伊川歎曰從者數百人馬數千能使悄然無聲馭衆如此整肅在朝雖有可議而才調亦何可掩也

廬陵云謝景山詩頗多如自種黃花添野色旋移高竹聽秋聲園林換葉柳初熟池館無人燕學飛之類皆無愧唐賢景山名伯景天聖二年甲科爲許州法曹詩文雄健俊逸得自母夫人女弟希孟亦工詩廬陵稱其隱約深厚守禮而不自放有古幽閒淑女之風

閩中撫聞

泉州府

九

九月山房宋熙寧間郡守陳偁建其子瑩中讀書其中晦庵爲同安簿秩滿寓此

墨妙堂在奉仙院中林少卿以東壁有蔡忠惠詩因以墨妙名忠惠詩曰日照溪山生翠光春深花草雜幽香登臨誰識遲留意門外塵埃去路長末云莆陽蔡襄慶曆四年二月二十日入延福寺登秦君亭觀白雲井訪北臺還書奉先東壁

王沂公曾聯捷三元末第時以梅花詩獻呂蒙正云而今未問和

羹事已向百花頭上開呂云此生已安排狀元宰相矣梁文靖

克家梅花詩云九鼎燮調終有待百花羞滿敢言芳亦魁天下

位宰相二人皆晉江人王爲武肅王審邦六世孫少隨父克官
益都父卒貧不能歸因家焉後孫判賀州曠回居晉江

瑞蓮堂在泉州講堂之右宋紹興二十九年有蓮異萼同蒂生於
梁克家讀書處次年克家廷對魁多士慶元四年生於學之槐
亭會從龍復作第一人因改槐亭爲魁瑞亭解邦後爲記

慶元戊午春會從龍時爲晉江教諭將應舉謁夢城中鐵爐廟神
書幅紙示之云兩爵並耀於今秋一薦獨橫於天下旣寤筆之
牖間越夕友人謝次山亦禱於廟夢神告之曰吾已語曾子明
矣請視其牖謝亟謁會及秋二人果並領鄉薦明年會遂登進

閩中樵聞

泉州府

士第一

林外字豈塵詞翰瀟洒談論不羈飲酒無算在上庠日獨游西湖
寂處得小旗亭飲焉外美風姿角巾羽篋飄飄然神仙中人將
去索筆題壁問曰藥爐丹竈舊生涯白雲深處是吾家江城戀
酒不歸去老却碧桃無限花明日都下盛傳某家酒肆有神仙
云後登紹興三十年進士

蔡持正

確

少於泗洲道中山寺讀書僧厭其久書舍有竹書一絕
壁間云窓前翠竹雨三竿瀟洒風吹滿院寒常在眼前君莫厭
化成龍去見應難已有宰相氣象

吳處厚

武人

始諂事蔡確後以推治舒亶獄爲確所怒確既守安州處厚知漢陽兩人益交惡會漢陽吏至安州確問處厚近況吏誦其秋興詩云雲共去時天漠漠雁連來處水茫茫確笑曰猶亂道如此吏歸以告處厚怒曰我文章蔡確乃敢譏笑耶及得車蓋亭詩乃箋注上之謂其子柔嘉曰二十年深讐今報之矣其子問知其詳泣曰此非人所爲大人何以自立于世處厚悔悟遣步追之則文書已投矣

蔡持正謫新州侍兒琵琶從焉常蓄一鸚鵡甚慧丞相呼琵琶卽扣一響板鸚鵡傳呼之琵琶逝後誤觸響板鸚鵡猶傳言丞相

閩中撫聞

泉州府

十一

大慟感疾不起嘗爲詩曰鸚鵡言猶在琵琶事已非傷心瘴江水同渡不同歸

泉郡北倚清源

一名齊雲

南挹紫帽清源聳起三峰有洞天三十六宋

裴道人仙蛻之所爲蛻巖有乳泉清冽不竭山與州因此得名陟其巔視郡城若鯉狀昔人題巖頂曰烟火城中萬戶夕陽此處孤僧紫帽有十二峯常有紫雲覆其上洞曰金粟唐元德真人鄭文叔所居傳有羽士自洛陽寄書文叔文叔握粟犒之歸視乃精金也宋寧宗御書金粟之洞勒其上絕頂有凌霄

江東裴道人紹興中來泉頭戴通草花行歌於市曰好酒喫三杯

好花插一枝思量古今事安樂是便宜人與之錢則買酒竟醉
莫知所止宿後數載坐化於清源洞郡人泥軀祀之號曰蛻巖
董伯華本屠者遇仙得度服炁煉形精五雷術戲鬻之童子與一
錢則畫符其掌中伸之雷聲殷然成化末坐化於清源紫澤宮
人泥軀以祀

僧普足建道場于安溪之清水巖石隙出米工竣而米絕鄉人祀
之禱雨輒應

宋季益廣二王從福州行都航海幸泉州駐蹕港口守臣蒲壽庚
拒城不納壽庚武人寡謀皆兄壽歲主之策定佯着黃冠野服

閩中撫聞

泉州府

十二

入法石山下自稱處士示不臣二姓之意而密畀壽庚以蠟丸
裏降表命善水者由水門潛出納欵於峻都既而元以壽庚歸
附之功授官平章開平章省於泉州壽歲亦居甲第有二書生
踵門自云從潮州來求謁也閩人辭以晝寢書生曰願得紙筆
書姓名以報遂各賦詩一首云梅花落地點蒼苔天意商量要
入梅蛺蝶不知春去也雙雙飛過粉牆來劍戟紛紛扶主日山
林寂寞閉門時水聲禽語皆時事莫道山翁總不知不署姓名
而去追之不及惶汗失措○蒲姓在元最爲烜赫明祖卽位乃
禁其不得讀書入仕

宋末邱鈞磯居海中小巖嶼著述甚富元遣御史馬伯庸來徵
蔡托種某自直伯庸使蓬萊花赤賞幣至家力辭不屈伯庸取
其著書以去所居之地有石棋局中鐫一聯云萬機分子路一
局笑顏回蓋其手筆也

淳化閣帖十卷宋李南猗遺於泉州已而百刻湮地下久之時出
光怪樞馬驚怖發之卽是帖也故泉人名其帖曰馬蹄真跡洪
武四年知府常性以劉次莊釋文叙而刻之後仁宗命取入秘
府人不可得而見矣又宋少師莊夏家摹一本今俱散闕不傳

夏秦

字西仲

元季進士不知何許人避亂居青陽石鼓山郡守胡器

閩中撫聞

泉州府

十三

與部使者多造其廬洪武十六年召至京師以老乞歸筆瓢屨
空處之晏如有送郡守詩離筵對芳草去路遶青山日暮雙旌
遠邦人拭淚看時稱爲二十顆珠

明詩人黃淑清少棄諸生遊四方窮覽名山勝蹟其題詠盡脫烟
火嘗陟華山感希夷遺跡有詩云五季干戈一枕間擔頭大千
起華山陳橋匡海須臾事公在夢中開笑顏後其從弟濂清倅
華州太守會屬僚于此酒酣命賦詩濂清素不工詩書是筵以
進舉座爲之閣筆

何鏡山

喬遠

泉趨詩八首有云宋家南外刺桐新鳳凰書室榻塚麒

麟至今十萬編民滿時有當年龍種人
宗正司聚諸王屬今趙姓者多其後

惠安張襄惠岳二十歲登解閩中其時天下省會皆有中官鎮守

舉子例合未謁則皆跪見公長揖而已中官恚曰今歲解元豈
琉球生耶後成進士官副都御史諫武宗忤嚴嵩氣節既高而
經濟文章理學亦備誠一代之偉人也

蔡虛齋清以理學從祀 廟庭賜諡文莊舉解元時清源山鳴

如玉磬者三日

傳行人凱出使海外國謁夢九鯉湖有孺子歌曰青草流沙六六

閩中撫聞

泉州府

十四

濟心識之比及番王設宴請曰小邦有一對句願天使屬之曰
黃河躍浪三三曲傳卽舉夢語王驚服之蓋中國黃河九曲而
彼國有流沙三十六灣彼自謂知中原之勝而吾乃悉彼疆界
之詳用是震聳

鄧寒松名城少與俞虛江大猷為刎頸交讀書清源山上一日夜

深同出山坳步月月明如晝萬籟寂靜忽聞石壁間啾啾之聲
二人攀籐葛相扶而上見一黑丈夫若呼若召曰吾老猿公也
望子久矣遂授以棍法拳法凡數夜而後精習一時有俞家拳
鄧家棍之號後二人平倭以武功顯

丹陽有陳少陽祠祀宋太學生陳東也鐵鑄汪伯彥黃潛善赤體
跪庭下泥沙滅膝推不可動南安鄭普過之爲題一聯云丹陛
披肝千古綱常可托荒庭屈膝兩人富貴何爲二像應筆而什
頭抵階階石爲斷

蔡少叅一槐年六歲往姑夫家看燈姑夫試以對曰元宵燈火滿
街衢卽應曰大地文章連斗極後十四歲中鄉試填榜矣主考
慮早達不成令器故不以題名而又令赴鹿鳴宴次科十七始
中

惠安詩人元則進士盧圭齋琦明則山人黃吾野克晦吾野少善

閩中樵聞

泉州府

十五

畫不工詩或謂之曰不工詩不能使畫重乃發憤學詩詩名遂
與沈嘉則王伯穀相上下

鄭半村祐善鼓琴聞粵東寡婦善孤舟操重繭至粵賃屋比鄰月

餘得聞其音卽按節譜之以歸後遊金陵嘗於月夜揮絃名妓
馬湘蘭竊指聽之忽止不彈曰有鄭衛音何也湘蘭再拜乞授
操終以教坊人爲嫌不傳也李卓吾以半村琴與吾野畫稱惠
安雙絕

嘉靖辛卯陳讓赴秋闈求夢九鯉湖是夕無夢廟中道士夢神曰
前度劉郎今又來合其告陳陳亦不解是科陳中解元始知前

科解元劉汝楠陳卽前之劉也陳晉江人劉同安人

嘉靖時九廟災詔陳時陳失御史楊爵疏五事繫獄數月無敢

言者周蹟山天佐爲一部主事上疏曰求言之道示人以言不

若示人以政陛下令一司條奏闕失今楊爵所犯在於過直情則可矜古聖王求諫嘗立毀謗之木毀謗非事君之義而帝王不諱者慮下無直言而上不聞過也天子之尊所少者不在唯諸稱頌之滿庭而在憂盛危明之一士在廷諸臣不負此義者獨爵耳願察爵之言原爵之心亟從寬釋不吝採行則人心喜悅天道降康矣疏聞廷杖越二日而斃年三十後賜諡忠愍

閩中撫聞

泉州府

十六

北平扈氏女年十七歸晉江鄧宦某爲妾嫡妒閉之幽室數年不得見鄧歿乃出之氏奠柩前自經死衣帶有詩云征塵萬里伴夫君冷落深閨哭不聞薄命峨眉終見妬一縑斷送到燕雲又云飛燕伯勞此日分斷腸無計黯銷魂願從蛺蝶飛青草攜手雙雙到鬼門

鄭仰田惠安人

少稚魯不解治生父母惡之逃之嶺南爲寺僧種菜

僧復逐之無所歸號泣於野有老僧遇之曰吾遲子久矣偕入山授以青囊壬遁射覆諸家之術於是言皆奇中見人無貴賤一揖而外箕踞嘯傲若不知有人步行可逐奔馬遍遊海內至

京公鄉爭延接之魏奄召問休咎時奄覽一方鏡指以爲問答曰四國一人也奄大悅贈以千金出謂人曰吾詭詞以逃死耳向所占者乃囚字也時有斷繩掛梁間指示曰魏某其如此乎未幾忠賢縊死

隆慶庚午鄉試合順天榜泉中登兩元五十八士省元爲同安林奇石北畿領解則晉江李文節廷機先生也是科之彥第進士者二十二人文節則鼎甲拜相爲一代偉人矣

萬曆己丑冬至黃宗伯鳳翔將祇事郊壇齋署中夜與同僚東阿于公富順李公擁榻夜談既就枕夢有投刺者曰于尙書使者

閩中撫聞

泉州府

十七

也開函諦視弗覩名姓刺中有二語云空山一淚憑誰寄萬古孤魂祇自愁讀竟遽覺起以告二公少選浙江巡撫傅公請爲于肅愍易諡疏至于公曰夢徵矣幽明感通一至是耶因請改諡曰忠愍得俞旨輿論愜焉

蔡江門道憲

授長沙司李張獻忠逼長沙重臣大帥皆遁去公獨

誓死固守有尹先民者夙稱名弁因結之以衛民賊至先民竟降公力不能支乃整衣冠北向拜俄爲賊所執獻忠降階語曰我素知公公勿自苦公厲聲怒罵賊釋而又縛者三乃遣先民說之公怒曰朝廷何負爾而反耶踢其齒流血復數賊罪賊知

不可屈遂磔之公從容就戮賊爲流涕氣垂絕猶作忿恨聲賊問何恨曰恨不殺先民耳心血直濺賊面賊爲昏仆久之死年二十九衙卒林國俊等九人侍立不去賊諭不屈皆殺之自一至五引頸受刑四卒忽起曰願葬主而後死賊義之於是四人解衣裹公體血肉狼籍點血在地皆拭之瘞於醴陵陂畢皆自經死賊乃并葬九人于墳側公晉江人字元白諡忠毅

李賊寇亳州晉江忠壯何公燮堅守孤城晝夜不懈賊軍雲梯蟻集城陷被執賊以甘言誘之公強立不屈大罵曰吾頭可斷不可辱也賊斷其足罵益疾復割其胸旋罵旋割仰天呼太祖者

閩中撫聞

泉州府

十八

三賊衆有泣下者嘆曰好烈漢磔死懸其首於市三日耳鼻皆動賊相顧驚愕

康熙一統志云晉江諸生陳顯謨慷慨負大節聞李自成陷京師顯謨具衣冠謁廟解所繫絛自縊明倫堂鐘架學博急解其絛移時息始續顯謨裂眦言曰吾爲此者以大義難逃於天地間耳今救某是不欲成某之志也天耶遂杜門不出

陳綠厓

寶鑰

觀察青州一日燕坐忽有小鬟年可十四五褰簾入

蠻髻朱衣繡半臂鳳髻鞞腰佩雙劍曰妾故衡王宮嬪林四娘也早死殯於宮中宮破北去妾猶戀故墟今宮殿荒蕪欲假君

亭館延客幸無疑焉自是日必一至但聞笑語酌醉久之亦設
具讌陳及陳鄉人公車十數輩旨酒佳釀不異人世然不知從
何至也酒酣述宮中事甚詳引節而歌舉座沾衣一日告別曰
妾塵緣已盡當往終南來相訣耳自後遂絕有詩一卷程會元
嘉量記其一云靜鎖深宮憶往年樓臺簫鼓遍烽烟紅顏力弱
難爲厲黑海心悲只學禪細讀蓮花千百偈閑看貝葉兩三篇
梨園高唱闕三字君試聽之亦惘然

洪奕懿知會同縣愛民如子人稱爲洪佛先是會人不識海鱉爲
何物每成羣上岍食禾稻瀕海人訝爲鱷魚莫敢捉公至往視

閩中撫聞

泉州府

十九

之曰鱉也取而食之教以烹飪之法自是其俗以爲異味鱉患
遂絕年穀豐登會人建祠海濱以祀公謂其足治此物也今其
俗稱鱉爲洪魚

紫農山人洪承峻太傅承疇季弟爲諸生工詩文尤喜臨池行草
蜿蜒迨縱時人目之曰龍蛇字 國朝定鼎後欲官之辭 康
熙間欲官之又辭時兄方貴盛獨偃蹇巖壑夷然自放不能強
也

榕城詩話云李光坡茂夫安溪介弟隱居不仕潛心經學著三禮
述註

仁廟賜聯云道通月窟天根裡人在清泉白石間亦榮遇也

晉江有賣草翁獨居一室日從市歸則焚香掃地烹茶吟詩以自適一日題詩九日山適邑令繼至誦詩使人物色焉遁去不知所往詩步明人丁少鶴韻云蓮花峰上起孤亭亭自蕭疎峰自靈垂地修藤千丈碧参天占柏萬年青仙蹤秘籙無尋處怪石幽花不記齡他日名山投老去飄然塵外作閒丁翁王姓名傳